

重修伊陽縣志卷之四

知縣湖南清泉張道超輯

人物志

鄉賢
方伎

耆舊
仙釋

武勲
列女

流寓

伊陽與陸渾伊闕迭相廢置今陸渾在嵩伊闕在洛篤生人物二地早爛然簡冊舊志所載幾疑借才然沿革可稽卽維桑止敬別之曷若因之若設縣後灼然可考者例得備書志人物

鄉賢

商

伊尹力牧之後居伊水

見呂氏春秋

堯之後也今洛之伊陽縣伊

川

路史

伊陟尹之子爲左相祀鄉賢

後漢

胡昭陸渾人後漢末隱居陸渾山躬耕不仕盜孫狼爲亂戒

衆毋得人邑人賴以保全魏文帝辟召不就年八十九而

卒祀鄉賢

唐

孫平子伊闕人博學能文舉文詞清麗科翰林學士

通志見薦辟

後爲右正言簡直敢諫開元中遷中宗於別廟而祀睿宗
平子上言春秋譏魯躋僖公兄臣於弟猶不可躋況弟臣
於兄乎若以兄弟同昭則不應出兄置於別廟太常博士
陳貞節馮宗蘇獻以平子誣罔獻頌之兄也卒從其議平
子論不已謫爲都城尉然時論多是平子祀鄉賢

劉廼字永夷伊瀾人少穎悟誦六經日數千言善文詞爲時
推目天寶中進士建中四年拜兵部侍郎德宗狩奉天廼
卧疾私第朱泚遣人召之固稱篤復遣僞相蔣鎮慰誘廼
佯瘖不答炙無完膚鎮知不可脇遂止廼聞車駕如梁州

自殺於林搏膺呼天不食卒年六十帝聞其忠贈禮部尚

書謚貞惠

通志云謚忠惠見忠烈

祀鄉賢子伯芻字素芝拜右補闕

稍遷侍郎孫寬夫寶歷中監察御史端夫太常博士以駿

韋綬謚議知名寬夫子允章咸通中禮部侍郎

李素刺吏燮之子祖乾秀爲伊闕令因占籍焉元和初舉明

經

通志云舉制科官侍郎見薦辟

歷官京兆尹監察御史正直不阿權貴

憚之曾知蘇蘄二州時李錡叛素提兵邀擊之馬蹶爲賊

所獲會錡敗得脫賜紫衣金魚拜河南少尹卒年五十八

昌黎韓愈銘其墓

按韓誌云葬河南伊闕鳴皋山下鳴皋今在嵩界故誌銘不載祀鄉賢

子四人長道敏舉進士次道樞道本道易皆好學而文

任仲伊闕人事親居喪著至行

見唐書

宋

李琪伊闕人幼孤撫育於兵家因得給事宜祖左右以材力見稱及太祖受禪以徵辟舉累遷効忠都虞侯太平興國初爲富州刺史後加左武衛大將軍景德中移疾歸真宗念舊勞月賜俸錢終其身祀鄉賢

程顥字伯淳珦第二子甫冠舉治平中進士授京兆鄠主簿調上元又爲晉城令民以事至縣者必告以孝弟忠信尋

授中允權御史裏行神宗數召從容諮訪顥以誠意感主
前後進說甚多王安石更法令顥每爲帝言君道以至誠
仁愛爲本未嘗及功利乞去言職及改簽書鎮寧軍節度
判官又改太常丞知扶溝縣監汝州酒稅哲宗立召爲宗
正寺丞未至卒年五十四顥資稟旣異而充養有道純粹
如精金溫潤如良玉寬而有制和而不流忠誠貫於金石
孝悌通於神明視其色其接物也如春陽之煦聽其言其
入人也如時雨之潤胸懷洞然徹視無間自十五六時聞
汝南周茂叔論道遂厭科舉之業慨然有求道之志未知

其要泛濫於諸家出入於老釋者幾十年返求諸六經而後得之明於庶物察於人倫知盡性至命必本於孝悌窮神知化由通於禮樂辨異端似是之非開百代未明之惑爲政治惡以寬處煩而裕當法令繁密之際未嘗從衆爲應文逃責之事人皆病於拘礙而處之綽然衆憂以爲甚難而爲之沛然雖當倉卒不動聲色深有意經濟方召用遽卒士大夫識與不識莫不哀傷焉文彥博探衆論題其墓曰明道先生謚曰純淳佑元年加封河南伯元至順二年加封豫國公從祀

文廟

程頤字正叔顥之弟少遊太學試頤子所好何學論胡安定得之大驚處以學職哲宗朝擢崇政殿說書疏言人主接賢士大夫之時多親宦官宮妾之時少則君德成就每當進講必宿齋預戒潛思存誠冀以感動上意然入侍之際容貌極莊謂人曰吾以布衣職輔導不敢不自重也以天下自任議論褒貶無所顧避由是同朝之士疾之如讐與其黨類巧爲詆謗遂請罷歸田里紹聖初追貶元祐諸臣頤編管涪州徽宗立判西京國子監受俸一月致仕崇寧

二年言者希蔡京意論頤邪說該行惑亂衆聽除直秘閣
名頤乃遷龍門之南止四方學者曰尊所聞行所知可矣
不必及吾門也五年復宣義郎致仕卜居陸渾卒於家年
七十有五頤於書無所不讀其學本於誠動止語默一以
聖人爲師得孔孟不傳之學爲諸儒倡著易春秋傳平生
誨人不倦故學者出其門最多淵源所漸皆爲名儒世稱
伊川先生高宗朝詔贈直龍圖閣謚曰正淳祐元年加封
伊陽伯元至順二年加封洛國公從祀

文廟

按程子故里在嵩墓在洛皆非伊境然伊析自嵩而嵩
在宋時名伊陽高山景行未可以後世之方域限也

耆舊

唐

梁肅字敬之陸渾人建中初舉文詞清麗科擢太子校書郎
蕭復薦其材授右拾遺修國史以母老不赴召爲監察御

史轉右補闕翰林學士卒贈禮部郎中

通志誌
文苑

卓保昶天成中官殿直銀青光祿大夫檢校工部尙書兼御

史大夫上柱國夫人李氏葬於城北今名其村爲卓墓

保昶

雖無事蹟可誌然確見爲
伊人其爵其地不忍沒也

元

蘭溪伊陽人官監察御史

舊志作
藍玉誤

明

張大興三屯鎮人邑中富戶出粟貸人往往取息幾倍貧者
益窘大興慨然出已粟且輸地爲公家有擇廉平者掌之
薄取贏息以濟匱乏又獨任合族中之徭役以息爭競邑
令武公鎬表其閭曰義重一鄉萬歷三年居民立有碑記
劉廷臣邑庠生嘉靖時人事親孝承歡孺慕無間朝夕父亡

墓西郊廬墓三年哀思終身卒妻張自縊以殉妾陳氏撫

孤四十餘年孝節萃於一門雍正六年入忠孝祠

先是萬歷三十

七年建祠立

坊載孫志

張維垣字奎岳以選貢中萬歷庚子鄉試幼孤繼母夏撫育

之性穎悟日誦數千言登賢書不第篤志力行事繼母至

孝同祖兄弟七人友愛無間言遇歲歉煮粥賑飢設義塾

延師以教邑中子弟之貧者創修義渠疏汝水溉田數十

頃居民賴之事詳孫傳康熙丙寅年從里民請祀鄉賢

魏文麗下蔡鎮人建義學於岱岳觀損已地出脩脯以延師

邑令令公宗澤陸公宗贄義重之爲之申請以垂永久今地不可考矣義學基碑記猶存

葉巍然字愛貧庠生明季地糧不均窮黎苦之天啟七年巍然詣關上疏請丈地均糧崇禎十三年歲大旱不停徵巍然又上災傷疏請旨蠲免邑人德之雍正六年入忠義祠張言順字蒲溪好善樂施崇禎時屢行賑濟贈義官有墓碑劉昌嗣字繩哉廩膳生父鯤邑庠生明末流土賊寇交訖鯤父子避賊驚散鯤遭土寇馬一平害之甚慘烈事平昌嗣歸控官不獲理屢欲手刃之又不獲已而一平死每恨大

仇未報晨昏慟哭遂絕意舉業語人曰吾父死於非命吾忍以善終乎其子溥與家人謹守一日伺守者偶懈自經而死

張化龍大安鎮人邑廩生明末土寇猖獗避邾投徒城陷獨整衣冠危坐學舍中賊大奇之諭使降化龍責以大義遂遇害諸生趙先第有傳載藝文

杜象海字谷王何南秀字彥列俱諸生爲伊名宿崇禎甲申

聞李自成犯京都二人北向痛哭棄廩餼入山不知所終

孫志載杜生何生不辭妻孥不留姓名謝志始詳

王愼勤字靜宇少爲諸生攻苦績學爲文沈雄典博屢試高等學使校士兩河目爲國士僅中副車入仕士論惜之傅鳳翔歲貢生闖賊入境同里避亂河北賊退相攜旋里分已田以予衆

邢可述以文生通武畧闖賊逼境邑令孔貞璞詳給千總劄付保守金山寨賊攻二十餘日不下後爲讐人誘陷賊中不屈死先是訛傳可述已降寇訪確後人皆感泣邑紳李馥爲立傳

國朝

庠生邢于廷可述子因父死于賊日夜痛哭淚盡繼之以血
後獲仇人聞於官以通賊訊實立時正法有山西少年夫
婦奉母逃荒至白元母病乏食欲賣妻以養母于廷聞之
助粟米給藥餌夫婦獲全母病亦愈洛紳溫煖爲立傳

常秉彝字全樸性恬淡不樂仕進授陝州訓導告歸清苦異
常舌耕自給伊人士多所造就前明胡志散佚順治己亥
偕劉別駕象明搜輯纂修於邑秉實有草創之功

夏毓鳳字鳴陽歲貢生博聞強記值明季兵燹後友教伊洛
汝封間經史皆口授一時知名士皆出其門子廷璧字金

章中康熙癸巳恩科舉人以侍親疾未赴公車父沒孺慕終身

翟安宅字元居邑廩生湯西崖學使集諸名士遊風穴與汝上翟節有二難之目講學汝洛間嘗言爲學本分內不得留一缺處本分外不容參一妄想時以爲名言

楊琮字子獻邑廩生居秦淀村著有四書貫旨自敘云生平文藝草蛇灰線得力於雲中官斯書鴛鴦繡出金針暗度李乃果字天木邑增生誦遺書或問等書不訛一字據舉比而談四座風生性嚴正面數人過而人不怨嘗與里中張